

Činja dale kaž planowane

Budyšin (SN/JaW). Inicijatiwna skupina za serbske ludowe zastupnistwo – Serbski sejm pokročuje ze zapisowanjom wolerjow do lisćin a z wólbami kaž planowane. To zdžěli hornjoserbski řečnik inicijatiwy dr. Měrćin Wałda na naprašowanje. „Njejsmy nastupili, zo bychmy so kłonili a swoje principije spuščili“, potwjerdži wón wolu sejmikarjow, swój puć dale kročić. Kaž Njeswačan dale zdžěla, „dyrbi so w serbskej a lužiskej politice něšto změnić. Njezměni-li so na politiskich zakładach ničo zasadneho, změjemy drje hišće serbski muzej, za přichod Serbow pak budže jara wusko.“ Zdobom dr. Wałda namołwja, zo dyrbja sej Serbja, „dołhož su hišće w někak stabilnej demokratiji žiwi, wjetše a stabilniše prawa a móžnosće wuwujować, kotrež nam cyle jasnje přisteja“.

Spřećiwjenje wokrjesneho sejmika, zo inicijatiwa ideju serbskeho parlamenta gremijej předstaji, ma Wałda za „skandal“. Na zašty m wuradźowanju 25. junija bě wjetšina wokrjesnych radźičelow naprašowanje sejmikarjow wotpokazała. Šěsnaćo su próstwu podpěrali, a někotři so hłosa wzdachu. „Najwjetši džěl serbskorěčneho teritorija leži džensa w Budyskim wokrjesu. Serbja su lud a płaća dawki. Skandal je, zo njesmědža Serbja 30 lět po komunizmje přeco hišće demokratisce swoje ludowe zastupnistwo wolić a njesmědža ani wo tym diskutować. Zakładny zakon płaći tež za Serbow“, zwuraznja hornjoserbski řečnik inicijatiwnikow swój hněw nad zapowědženjom, wokrjesnemu sejmikej so předstajić. Runočasnje skedźbnja wón na to, zo běchu jenož „někotři rozmołwu wotpokazali, na přikład z CDU. Někotři pak sej samo žadaja, zo so wo tym řeči a su nas na rozmołwu přeprosili, na přikład Kamjenski měšćanosta Roland Dantz.“ Tohorunja twjerdženje, zo „njeje wokrjes přislusny“, wón wotpokaza. „Po wustawje je stat, to řeka wšě jeho džěle hač ke komunam, zamołwitosć přewzał za žiwjenje a daletraće serbskeho ludu, jeho řeče a kultury.“

Hižo tydženja bě so w naležnosći předsyda Budyskeje SPD dr. Měrćin Krawc – wón je sam člon inicijatiwy Serbski sejm – słowa jimał a rozsud radźičelow wokrjesa Budyšin raznje kritizował. „Štóž nětko wutworjenje demokratiskeho strukturu k samopostajowanju ludu haći, so wědomje z etnocidom serbskeho ludu wotnamaka“, pisa wón mjez druhim w nowinskej zdžělece.

Bóle informować

Čłonojo inicijatiwneje skupiny Serbski sejm činja dale kaž planowane. To řeka, kóždy móže so dale do lisćiny wolerjow zapisać, zo by sobu wolić móhl. Kelko ludži je dotal zapisanych, pak inicijatiwnicy njepřaja. K tomu wottam jenož řeka, zo su „wólby tajne a podleža wólbnemu porjadu, w kotrymž steji, zo so interna do zakončjenja wólbow do zjawnosće njedawaja“. Serbske Nowiny pak so dale naprašuja. Wšako je zajimawe zhonić, kelko ludži chce poprawom tajki „serbski parlament“ wolić. Měnenja wo nim džě su jara rozdžělna. Mnozy dzerža k Domowinje, kotraž hižo dlěje hač sto lět serbske zajimy zastupuje. Druzy su sejmey jara wotewrjeni a jón witaja. Fakt pak je, zo přemało ludži wo ideji, móžnych nadawkach a zwoprawdženju wšeho wě. Inicijatiwnicy njeměli tuž přejara wo „skandalach“ a zmylkach druhich řečeć, ale ludži na městnje bóle wo swojej naležnosći informować.

Janek Wowčer